

Vorrede.

Larffen/auff vnuerstand auff's Papyr hingeschmieret: Derwe-
gen so bin ich auß Christlichen mitleiden verursacht / allen
Liebhabern / vnd ansehenden / dieser herrlichen Kunst/zur be-
förderung diß Buch Medullam Destillatoriam & Medicam, so
ich schon vor etzlichen Jahren an Tag geben /vnd zwar zum
andern mahl augmentirt vnd drucken lassen/wiederumb (nach
dem mahl alle Exemplaria abgangen/vnd mit besonderer be-
gierde gesucht worden) für mich zunemen/dasselbige mit gros-
sem fleisse zu vbersehen / in eine rechte bessere vnd bequemere
Ordnung zu bringen /vnd in zwey vnd zwanzig vnterschiedli-
che Tractatus richtig abzutheilen / wie dann solche Tractat or-
dentlichen nach dieser Dedication erzehlet werden: Darinnen
ich gar viel künstliche Chymische Præparationen vnd Destillatio-
nen, gantz warhafftig/alles gar klärlich vnd deutlich mit hand-
griffen vnd Secreten/ mit guter erfahrung / verstande vnd be-
stande/dermassen vnterrichten vnd lehren thue / daß ich wol
weiß/daß bißhero (jedoch ohne stolzen vbrigen ruhm zu mel-
den) dergestalt noch keines in vnser teutschen Sprache in den
Druck gekommen: Nicht achtende vieler Artisten vnd anderer
neidischer Abgünstigen verdruß vnd vnwillen /so sie derwegen
auff mich schöpfen werden / sondern viel mehr meines Nebe-
sten nutzen/ bestes / vnd frommen bedencckende / dann die D.
Göttliche Schrift / so wol auch der weysen Deyden nützliche
Sprüche /vnd die Natur selbst vns lehret / daß wir Menschen
einer dem andern zu guter Beförderung / Nutz vnd Dienst er-
schaffen sein/ Derhalben auch ein jeder Mensch/ nach den Ga-
ben/so ihme der Allmechtige GOTT gnediglich mitgetheilet
hat/den andern die Hand reichen/ Ja mit dem jenigen pfund/
so der liebe GOTT ihme gegeben vnd vertrawet/ nach höchstem
vermögen getrewlich wuchern soll vnd muß. Ich habe auch
ferner diß Buch mit vielen wolbewährten Experimenten/vnd
andern köstlichen Medicinen vnd Artzneystückten gezieret / die
ich würdig erachtet / daß sie durch den Druck/ vornemlich den
Kunst